



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8

## North Korea nung rocket launcher drills ayongzuka agiogo

## KL Rahul IPL asayatsü temsüa akümba sangdongogo

VOL. XXI ISSUE NO. 157 (ADOK 157) DIMAPUR RASEMNÜ (WEDNESDAY) METSÜREMI (MARCH) 20, 2024 ₹ 5.00

## NESO-i SC nung CAA anema petition agütsü

New Delhi, March 19, 2024 (Agencies): North East Students' Organization (NESO)-i Supreme Court tsüngdang Citizenship (Amendment) Act, 2019 (CAA) anema petition ka benokogo.

North Eastern region nung Citizenship (Amendment) Act, 2019 indang Rules ajanga tetsükdaksü bentsür arutsü ta shia NESO-i iba ken o benok.

"Onoki North East nung lisopurtem taginübatem kümzüka ayutsü tenangzükba yur inyaker. Onoki Supreme Court nung Citizenship (Amendment) Act, 2019 indang Rules anema petition ka benokogo aser CAA mapa metenzüki atatsü mepishiogo" ta NESO Chairman Samuel Jyrwa-ashi.

December 19, 2019 nunga NESO-i Supreme Court nung CAA, 2019 anema petition ka benoka liasü.

Inner Line Permit (ILP) beshidak aser Sixth Scheduled tesemtem nung CAA mebenokaka Assam kübok district 27 nung CAA mapa tenzükba ajanga North Eastern state tem asoshi lendong bentsür arutsü ta NESO-i ashir.

"Bangladesh nungi ozüing alema arur onsara akümba ajanga North East nung lisopurtem timtemer. Anungji Bangladesh nungi ozüing alema arurtem

azüoktsü atema CAA mapa metenzüksüla" ta NESO Chairman, Samuel Jyrwa-isa ashi.

### Meghalaya nung Inner Line Permit meshir

Meghalaya nunga Inner Line Permit (ILP) system tenzüksü atema nenshitsü tenzükogo. Meghalaya nung CAA mebenoktsü saka kidanger Assam nungi nisungtem arutsü tsübuwa bilemba agi telok balalai ILP tenzüksü akhanger.

CAA kübok lisopur tesemtem maden saka Shillong ya Sixth Schedule nung maden anungji tangartem arua alitsü akok aser CAA tajangzük agitsü, ta Hynniewtrep Youth Council (HYC) president Roy Kupar Synrem-i ashi.

Meghalaya nung CAA ozüing mebenoktsüla aser ILP mapa tenzüksüla ta pai ashi. Kasa tebilembaji Jaintia National Council (JNC) aser Confederation of Ri Bhoi People (CORP) ajanga metetdaksüogo.

Meghalaya Legislative Assembly-i 2019 nung ILP tenzüksü atema bangzüng ka renemogo saka Union Home Ministry nungi ano temelaba mangu lir.

Chief Minister Conrad Sangma-ia Prime Minister Narendra Modi dang lisopurtem kümzüka ayutsü atema ILP mapa nungdakba shiogo.

## Eastern Nagaland Public Emergency nung tenokdangbatem agientsü



Dimapur, March 19, 2024 (TYO): March 21, 2024 nungi tenokdangba ajak agientsü saka Eastern Nagaland Public Emergency maneni alitsü ta metetdaksüogo.

March 19, 2024 nü Tuensang nung Eastern Nagaland Public Emergency Public senden amending iba lemtet agi.

Union Home Minister-i December 7, 2023 nü Lok Sabha election 2024 atema Election Model Code of Conduct metenzükdang Frontier Nagaland Territory tentetsü ta nangzükba meinyakba atema Eastern Nagaland ajungalen Public Emergency tenzük.

Eastern Nagaland Public Emergency-isa February 23, 2024 nü Chenmoho bangzüng renemba ama Eastern Nagaland nung alirtemi central aser state election nung shilem magitsü ta tanü bangjemtep.

Senden nung adenertemisa ENPO dang Ministry of Home Affairs dangi shidi ka zülutsü tashi agütsü.

ENPO dak alaka Frontier Nagaland Territory dak sendakba shidi mesüra tebilemba shinga dang nungia magizüksü atema shidi ka zülutsü teloki nungloksü.

ENPO-isa Eastern Nagaland Legislators' Union (ENLU) den asüngdangteper Tuensang HQ nung hopta ka tsüngda ENLU züngsem 20 prong den public senden ka amentsü tashi agütsü.

### FNT indang final draft merenem: MHA

March 15, 2024 nungi Eastern Nagaland MLA 20 tashi New Delhi nung amongdang Advisor (North East) & Joint Director, Intelligent Bureau, Ministry of Home Affairs AK Mishra den ajuruteper.

Eastern Nagaland MLA 20 temisa Union Home Secretary, IB

Director, IB Joint Director aser Additional Secretary Home nunger den ajuruteper senden amen.

Iba mapang parnoki MLA tem dang Frontier Nagaland Territory (FNT) indang final draft mali saka working paper dang lir ta ashi.

Iba working paper ya kanga junga shisadangtsüla aser sendaktepa alir ajak dang nungi tebilemba ajak angadanga sülen ang final paper ka renemtsü. Iba nung agientsü mesüra enoksemtsü lenmang lir ta MHA ketdangsurtemi ashi.

MHA-isa final draft renemtsü atema mapang telatet ka magütsü.

Eastern Nagaland Legislators Union (ENLU)-i Eastern Nagaland People's Organization (ENPO) dang senden amenba osang lemsatper aser ENPO dang lungkak aitba anena atatsü mepishiogo.

## Kohima nung dokan 12 rongdok



Kohima, March 19, 2024 (TYO): Chakhesang Baptist Church, Kohima anasa Kitsubozou nung tanü dokan 12 rongdokogo.

Iba kitsükkirong lendong nung ki ana nung dokan 12 mitsü küma rongdok aser temeket aliba ki kar raksa.

Tanü anüngdang 12:00 ako meta mi lendong atalok aser idangji ki anasa aliba gari 6 aser motor bike 2 rongdok.

Iba osang zülü tashi nung mi adokba kuli aser rongsen akoksaba osang tejangja mali.

North aser South Fire Stations Kohima nungi fire

tenders den Assam Rifles nungi water tankers aser fire fighting parties ajanga mi enseptet.

"Nagaland Fire & Emergency Services, Nagaland Police, Assam Rifles, Kohima Village Youth Organization, SDRF from Nagaland State Disaster Management Authority, Red Cross Society, anameta aliba kiyongertem, telok balala aser arogotemi yariba atema kanga pelar" ta Kitsubozou Panchayat, Kohima chairman Dzieseneilie Sachii-i ashi.

March 20 anepdang 7:00 ako nungi lokti nübodoka merükmeju mapa inyaksü ta Sachii-isa ashi.

## SC-i CAA sota mayur saka Centre nem hopta 3 züingzüksür

New Delhi, March 19, 2024 (Agencies): Supreme Court-i Mongulbarnü Citizenship Amendment Act (CAA) mapa sota mayutsü ashi saka kasa mapang Centre sorkar nem hopta asem tsüngda telangzüba agütsütsü mapang züingzüksür.

Lok Sabha election matongdang April 8, 2024 tashi nung CAA anema petition 237 benoka aliba atema telangzüba agüjang ta SC-i Centre dang ashi.

Iba anogo matongdang nisung kar nem danga senso agütsüra petitioner temi ken o benoktsü akok ta SC-isa ashi. Senior lawyers Kapil Sibal aser Indira Jaising nati iba temepishiba agüja liasü.

Sorkar atema o jembir Solicitor-General Tushar Mehta-ibo petitions langzüksü atema hopta pezü meshi.

CAA ken o ya Chief Justice

DY Chandrachud, Justice JB Pardiwala aser Justice Manoj Misra nunger adenba bench-i repranger.

CAA anema ken o benoker rongnung Indian Union Muslim League aser opposition lennirtem Jairam Ramesh (Congress) aser Mahua Moitra (Trinamool Congress) nunger dena lir.

CAA anema ken o benokertemi mapang tali meshilokba atema mashishitep saka CAA mapa meinyaki atatsü mepishi. Parnoki ashiba agi CAA ya Muslim nunger anema lir.

"CAA ya Parliament nung agizüker küm pezü süia arur general election ka agitsü anogo ishika lia mapa tenzükba osang sangdongba ya election nung nüboyimtsü aser ibaji talisa West Bengal o Assam nung lir" ta Congress lennir Jairam Ramesh-

i shiogo.

"CAA ya ozüingi memelar aser senso temeten agientsü tasa ka lir. BJP lennirtemi CAA ajanga nenok nem temeten agütsür ta ashir saka kodang nai senso meshidir na ozüing alema arur ka akümer aser nü temetentem samatsü. Nenok temeten samatsü aser detention camps-i anir aotsü anungji senso memeshidang jungjunga bilemdangang" ta West Bengal Chief Minister Mamata Banerjee-ia shiogo.

BJP-i 2019 manifesto nung CAA mapa tenzüksü aser refugee tem nem India senso agütsütsü nangzük. Iba tenangzükba nung ajemdaker 2019 küm Parliament nung Citizenship (Amendment) Bill agizük saka Covid ajanga mapa menudaktsü" ta Union Home Minister Amit Shah-i ashi.

### Dimapur DC office nung sensitization sentong ka agiogo



BSI Certified products tem amshiba dak sendakba nung sensitization sentong agiba mapang tangokba noksa nung angur.

**Dimapur, Metsüremi/March 19 (TYO):** Bureau of Indian Standards, Ministry of Consumer Affairs- Food & Public Distribution-i ayongzüka March 19 nü Dimapur Deputy Commissioner office Conference Hall nung BSI certified products amshiba dak sendakba nung sensitization sentong ka agiogo. Iba sentong nung Barashajyoti Baishya, BIS Consultant shisalen sayur liasü. Sentong nung tawa BIS

inyakyim dak sendakba nung tangazükba balala agütsü. Gram Pradhans tem nem, aluyimba, industry, aser consumer kumzüka toktsüba densema sector balala nung BIS-i koda tongtibang shilem agir, iba indang tangazükba agüja liasü. Kasa mapang nung Gram Pradhans tem nems standards tongtibang keta aliba informative Gram Panchayat booklets koda mapa kuma amshitsü iba indang tangazükba

agüja liasü. Nüburtem indang rongsen kanga junga amshitsü atema sorkari osettsü balala aliba mapang item standards tem sülen tashi anga anidaktsü koda tongtibang iba indang parnok nem metetdakja liasü. Iba sentong ya Extra Assistant Commissioner, Dimapur, Imlijungla Lemtur lenisüba nung agia liasü. Iba sentogn ya Nagaland kübok Gaon Panchayats 41 atema Guwahati Branch Office-i ayongzüka katsüogo.

### Dimapur nung artisan tem jangjashiba sentong agiogo



PM Vishwakarma website nung artisan tem jangjatsü atema Gram Pradhan aser ULB tem atema inyakyim dak sendakba nung March 19 nü Dimapur DC office Conference Hall nung sentong agiba mapang tangokba noksa nung angur.

**Dimapur, Metsüremi/March 19 (TYO):** PM Vishwakarma website nung artisan tem jangjatsü atema Gram Pradhan aser ULB tem atema inyakyim dak sendakba nung March 19 nü Dimapur DC office Conference Hall nung sentong ka agiogo. Iba sentong ya SDO (C) Dimapur, Yanthungbemo Kikon lenisüba nung agia liasü. Central Sector Scheme, PM Vishwakarma ya 2023 kum September 17 nü Ato Kilonser-i tenzükja liasü. Iba scheme ya artisans aser teka mapa inyaker shirnok pei ket nung aliba hadir amshia pei teka agi mapa inyaker parnok nem teyari agütsütsü asoshi lir. Iba scheme yagi mapa 18 nung sotaka aliba artisan aser teka mapa inyakertem ayimjemmer. Artisans aser teka mapa balala inyakertem nem teyari agütsübatem rongnung, PM Vishwakarma certificate aser ID card ajanga parnok jangjaba; anogo 5 nungi 7 tashi basic training aser anogo 15

mesüra iba dak tema advanced training agütsüba aser anogoshia stipend sen 500 agütsüba; Basic Skill Training tenzükba mapang e-vouchers form nung sen 15,000 tashi toolkit incentive agütsüba densema liasü. Iba scheme ajanga ano shilem ana kuma lemsar khen sen lakh 1 aser khen sen lakh ana ta ita 18 aser 30 tsungda Collateral free 'Enterprise Development Loans' sen lakh 3 tashi agütsür. Loan atema tetemlok 5% dang agir aser India sorkari 8% agütsür. Beneficiaries tem shirnok basic training temer lir parnok sen lakh ka loan agütsü temsüa akümtsü. Tanabuba loan tranche ya mezüngbuba tranche agir aliba beneficiaries tem shirnoki standard loan account ka shitak yuogo aser parnok shishilembaba mapang digital transactions amshir mesüra Marketing support nung Advanced Training agiogo parnok nem agütsütsü aser

quality certification, branding, GeM, advertising, publicity amala e-commerce platforms marketing teyari balala aser value chain tesendaktep tajungba kümdaktsütsü atema tanga shishilembaba inyakyim tem nung teyari agütsütsü. Iba den bendenloksema iba scheme ajanga beneficiaries tem Udyam Assist Platform nung formal MSME ecosystem nung 'entrepreneurs' ama züngoksemsütsü. Beneficiaries tem Common Service Centre tem ajanga züngoksemsütsü koba PM Vishwakarma portal nung Aadhaar-based biometric authentication ajanga asütsü. Beneficiaries tem züngoksemsüba sülen parnok jangjatsü atema jenjang asem agütsü, kong Gram Panchayat/ ULB level nung jangjashiba, District Implementation Committee-i Vetting aser Recommendation aser Screening Committee-i agizükba densema lir.

### DM-i Dimapur, Chumoukedima, Niuland atema tetuyuba agütsü

**Dimapur, Metsüremi/March 19 (TYO):** Taruba Lok Sabha General Elections atema Election Commission of India (ECI)-i March 16 nü sangdongba ama aser election yimjung nung sadem sadema kecha tetsükdaktsü makai agütsü atema Election Commission-i agütsüba guideline dak ajemdaker District Magistrate Kevithuto Sophie, IPS-i CrPC, Sections 144A kübok pa nem agüja aliba tashi dak ajemdaker ozüng agütsüba anogo nungi tenzükba

Dimapur/Chumoukedima/ Niuland district tem nung nisung shinga noknü balala (prnagbong, nok, süngsü, nü, bomb, lijak mesüra tangar amaktsü mesüra pei tema kumzüka ayutsü atema hadir ama amshitetba oset) kecha bener mesenzütsü tetuyuba agütsüogo. Iba tetuyuba ya jongdak nüngdak apir ajak ajanzüktsü atema agütsüogo aser osang tejangja ka magütsü tashi benoka atatsü, ta DC-isa metetdaktsüogo.

### Kohima DC-i tetuyuba agütsü

**Dimapur, Metsüremi/March 19 (TYO):** Deputy Commissioner Kohima Kumar Ramnikant, IAS-i, Representation of the People Act, 1951 kübok Section 127A dak ajemdaker pamphlets, posters amala print asüba dak sendakba nung tenokdangba agütsür aliba indang printing press ajak nem tetuyuba agütsüogo. DC-isa, taruba Lok Sabha General Election mapang item provision tem sülen tashi anga anidaktsü koda tongtibang iba indang metetdaktsüogo. Temalen shisema aliba provisions dak ajemdaker Kohima district nung aliba printing press ajak dang election dak sendakba nung parnoki

print asüba material ajak nung printer aser publisher tem indang tenüng aser address tem tejangja inoktsütsü tetuyuba agütsüogo. Maneni printer temi Section 127A(2) nung tetuyuba agütsür aliba ama parnoki print asüba material tem den publisher tem nungi declaration agizüker aliba indang copy asemsem print asüba sülen anogo asem tsungda DC Office Kohima nem agütsütsü nüngdaker. Section 127A aser Commission-i tetuyuba agütsüba sülen manidakra, state tenzüng ozüng tapet dak ajemdaker printing press licenses agintsüba densema tapet temerenshi agütsütsü, ta kasa sangdong ajangsa metetdaktsü.

### Prangbong injang bener mesenzütsü tuyu

**Dimapur, Metsüremi/March 19 (TYO):** District Magistrate Peren, Vineet Kumar, IAS-i March 18 nü sangdong ka ajanga, taruba Lok Sabha election tekumzüka kübok sadem sadema kecha tebandang makai agütsü, aser section 144 CrPC, 1973 kübok tashi agüja aliba dak ajemdaker Peren district kübok nisung shingaiia prangbong injang mesüra hadir balala bener mesenzütsü tetuyuba agütsüogo. Temzüng ozüng kübok

temelaba agütsür melira license aliba arms ajak March 30 nü tashi nungbo anasatiba police station nem bendanga agütsütsü tetuyuba agütsüogo. Paisa, iba tetuyuba ya Police personnel, Security forces aser law & order duty Officials/ personnel tem dak alia Peren District kübok aliba nüburtem ajak atema asütsü, ta shiogo. Maneni District Magistrate-i, iba tetuyuba ya osang agütsüba mapang nungi result mesangdong tashi benoka inyaksangshitsü, ta metetdaktsüogo.

### Swachh Bharat Mission-U.2.0 Kohima nung agiogo



**Dimapur, Metsüremi/March 19 (TYO):** Source Segregation & single-use plastics dak sendakba nung IEC program aser PETROS, School of Performing arts na longjemmer SWACHH BHARAT MISSION-U.2.0 nung shilem ka ama March 19 nü Kohima nung dry waste aser water recycle dak sendakba nung awareness sentong ka ayongzüka agiogo. Sentongtem ya PHQ junction, High School junction aser Old NST Parking nung agia liasü. Sentong nung Deputy

Mission Director AMRUT Mission, Vizokholie Keseyie-i ashiba agi, iba ya linük ajunga nung benokba sentong ka lir koba India sorkari moapu nung jana intokba anendaktsütsü aser solid waste aser liquid waste tajungba achaayangtsü atema 2014 kum October 2 nü tenzükba liasü. Paisa, mulung ajemertem, kiyong kidangertem nem tangazükba agütsütsü aser lokti ka ama jana bendanga intokba aser mashi mashi intokba yimya mebenshitsü atema longjemmer inyaktsü ayongzüka.



New Delhi, March 19, 2024: Mongolbarnü Supreme Court nung Citizenship (Amendment) Act, 2019 anema benokba ken o angadanga sülen Union Muslim League lenirtem- P. K. Kunhalikutty, Sayyid Sadiq Ali Shihab Thangal aser P. V. Abdul Wahab nungeri meyipa adodang tangokba noksa nung angur.

### CAA anema benokba ken otem Supreme Court-i angadangogo

**New Delhi, Metsüremi/ March 19 (Agencies):** Citizenship (Amendment) Act, 2019 anema benokba ken otem Mongolbarnü Supreme Court-i angadanga sülen SC-i Centre sorkar dang Citizenship (Amendment) Rules, 2024 soita atatsü atema mepishiba ken otem dak sendakba nung hopta asem tsüingda telangzüba agüjang, ta tuyuogo.

Citizenship (Amendment) Act, 2019 (CAA) anema benokba temepishiba ken o 200 dak tema Supreme Court-i angadanga.

Court nung Centre sorkari, iba ozüing ajanga shinga dang nungi linük senso magiener, ta ashi.

Centre-isa CAA anema benoka aliba temepishibatam dak sendakba nung telangzüba agütsütsü atema mapang meshia liasü.

Chief Justice of India, DY Chandrachud den Justices- JB Pardiwala aser Manoj Misra nungeri akümba bench-i item ken otem angadanga liasü.

Supreme Court-i maneni iba ken o ya April 9 nü angadangtsü. Supreme Court nung Centre sorkar tenüing nung jembitsür Solicitor General, Tushar Mehta-i CAA ozüingtem soita atatsü atema benoka aliba temepishiba 20 atemaji telangzüba agütsütsü atema mapang meshiogo.

Citizenship Amendment Act (CAA) anema Kerala-i mezüing 2020 küm Supreme Court nung ken o benoka liasü. Kerala state-i temepishiba shidi nungji, CAA ya India linük temzüing nung agüja aliba 'Right to Equality' anema lir, ta shia lir. Parnokisa tanga ken o ka nung Supreme Court nung CAA ozüingtem anema temepishiba benoka lir.

Tamalen Senior Advocate, Kapil Sibal-i Kerala nung aliba Indian Union Muslim League (IUML)-i Supreme Court nung benoka aliba temepishiba ken o metetdakja liasü.

Iba dak alia CAA anema ken o benoka alirtem rongnung Trinamool Congress lenir

Mahua Moitra, Congress lenir aser taoba mapang Union minister Jairam Ramesh, AIMIM tongti Asaduddin Owaisi, Assam Congress lenir Debabrata Saikia, melungtet teloktem- Rihai Manch aser Citizens Against Hate, Assam Advocates Association aser Law students densema lir.

Iba dak alia Debabrata Saikia, Asom Jatiyatbadi Yuba Chatra Parishad, Democratic Youth Federation of India (DYFI) aser Social Democratic Party of India (SDPI)-ia CAA Rules, 2024 anema temepishiba ken otem benoka lir.

2019 küm Parliament nung Citizenship (Amendment) Act, 2019 agizükba sülen taküm March 11, 2024 nungi iba ozüing ya mapa küma benokogo.

Iba ozüing kübok Pakistan, Bangladesh aser Afghanistan linüktem nung reshikangshi ajanga December 31, 2014 matongdang India-i arua jenoka alir Muslim nunger masüba nisungtem nem India senso agütsütsü.

### India nung nisung 900 shia doctor kaka 'ratio' tongtetogo: Kalita

**New Delhi, March 19 (Agencies):** India linüki shirangba agi taneptsü ngudaktsütsü atema rangloker nendaka inyaker, ta Parliamentary Standing Committee on Health & Family Welfare nung chairperson, Bhubaneswar Kalita-i ashi.

ASSOCHAM indang Illness to Wellness Awareness sentong tanabuba nung jembidang Kavita-i, "WHO-i nütsüing 1,000 shia doctor kakabosa alitsü ratio (1:1000) tuyur, ajüsüaka asenoki 1:900 ratio tongtetogo," ta metetdaktsü.

"Temang anema aliba aser merükmejuba ya loktiliba yangerba tongshitem lir. Menatepba tashidaktem den raraba nungi tenzüka tashidaktem nokdangba nung linüki merang tulu agiogo. Tesüiba küm ter tsüingda nosodang asüba ajema kümogo, kinü tanur asüba aser arrshi küm 5 ser tekübok tanurtem asüba kanga ajema kümogo," ta Kalita-i ashi.

"Item ajak ajanzüktetbaji ajanga healthcare mapatongtem tajungba akümba aser merükmeju tongtibang kümdaktsüba kuli sayur. Sorkari benokba mapatong balala aser sentong balala ajanga temang anema alitsü atema bilemba loktiliba ka kümdaktsüogo," ta pai ashi.

"Sorkari medical colleges aika lapokogo aser linük nung district shia nung medical college kakabosa alitsü

### Alima nung mopung temenentiba aliba yimtibaji Delhi lir

**New Delhi, March 19 (Agencies):** Alima nung mopung temenentiba aliba yimtiba (capital city) ji Delhi lir aser alima nung mopung temenentiba metropolitan area ji Bihar state kübok Begusarai lir, ta report tasen ka ajanga metetdaktsü.

2023 küm linük 134 nung mopung quality tamajungtiba linüktem rongnung India jenjang asemubana nung lir; India nung cubic metre shia 54.4 micrograms lir. Alima nung mopung quality tamajungtiba aliba linüktem rongnung mezüingbubaji Bangladesh (cubic metre shia 79.9 micrograms) lir, iba sülen Pakistan (cubic metre shia 73.7 micrograms) lir, ta Swiss organisation IQAir indang World Air Quality Report 2023 ajanga metetdaktsü.

2022 küm nungbo alima nung mopung tamajungtiba aliba linüktem rongnung India jenjang 8buba nung dang liasü saka tangbo jenjang 3buba kümogo.

Alima nung mopung temenentiba aliba metropolitan area ji Bihar state kübok Begusarai lir; 2022 küm rankings nungbo iba yimti ya züingsema maliasü.

asur kobi melii yimtsüingtem nung doctor tem agi manüingtsü," ta pai ashi.

Kasa sentong nung lokti pelaa agizükba o jembidang ASSOCHAM National CSR Council chairperson, Anil Rajput-i, "Tashidak teimbaka samadaktsütsüsa mesüra healthcare awareness ajanga tashidak aika azüoktettsüsa asenok dak scientific shisatsü lir, ta amanga iba mapatong ya 2014 küm tenzüka liasü," ta ashi.

Kasa sentong nung Fortis Escorts Heart Institute nung chairman, Dr Ashok Seth aser Govind Ballabh Pant Institute of Postgraduate Medical Education Research, Government of NCT nung Medical Director, Dr Anil Agarwal natia jembia liasü.

**Form No. 3**  
**[See Regulation-15 (1)(a)] / 16(3)**  
**DEBTS RECOVERY TRIBUNAL GUWAHATI**  
 Suwarna Bhawan, House No. 12, New Town Path, Near Hanuman Mandir, G. S. Road, Ulubari, Guwahati- 781007 (Assam)

**Case No.: OA / 46/ 2024**  
**Debt Recovery Tribunal (Procedure) Rules, 1993 nung rule 5 nung aliba sub-rule (2A) aser iba Act section 19 kübok sub-section (4) nung ajemdaker jaoker.**  
**Exh. No.: 4096**

**INDIAN BANK**  
 - Vs -  
**Aki Automotive India Private Limited & Ors**

To,  
 (1) Aki Automotives India Private Limited Represented by its Director, Unity Village 5th Mile, NH- 29, Near Faith Service (Indian Oil Petrol Pump), Dimapur, Nagaland, PIN- 797112.  
 (2) Mr. Akato Sumi Asür Kikheto Sumi'er jabaso, House No. 53, Thilixu Village, Block 1, Dimapur, Nagaland- 797111.  
 (3) Smt. Nukshikala Jamir Akai Aye kinüingtsü, House No. 53 C, Thilixu Village, Block 1, Dimapur, Nagaland-797111.  
 (4) Mr. Kiyelu Sumi Asür Kikheto Sumi'er jabaso, Director of Aki Automotives India Private Limited, House No. 128, 4th Mile, Diphupar A, Dimapur, Nagaland-797115.  
 (5) Smt. Kimyetoli Achumi Mr. Kiyelu Sumi kinüingtsü, Director of Aki Automotives India Private Limited, House No. 128, 4th Mile, Diphupar A, Dimapur, Nagaland-797115.

**JAOKER**  
 12.03.2024 anogo nung Hon'ble Presiding Officer/Registrar matsüingdang OA/46/2024 benoka liasü.  
**Rs. 2,92,89,821.66** sentsüh atema iba Act nung section 19(4) kübok application nung ajemdaker na anema (OA) benoka Hon'ble Tribunal-i jaoker/ notice agütsür (application den documents copies densema lir). Iba Act nung section 19 kübok sub-section (4) nung ajemdaker defendants dang tekübokken aliba tetuyubatem agütsür:-  
 (i) Iba case defend asürtemi tabaja agütsüba sülen anogo semer nü tsüingda relief asoshi mepishibaji kechiba magütsütsü, iba kulji sayutsü metetdaktsü;  
 (ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla;  
 (iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar;  
 (iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla;  
 (v) Ordinary business ajanga secured assets mesüra tanga assets aser kiojen nungi yokzüba senji security interest soita aliba bank mesüra financial institutions indang account nung deposit asütsüla.  
 Nü dang tezüluba nung sangdong applicant nem agütsütsü tuyur aser **18.04.2024** anogo nung anepdang **10:30** ako matongdang Registrar matsüingdangi arutsü tuyur, yamaji meinyakra application ji angadangtsü aser na meliaka telemtetba agütsü.  
**15.03.2024** anogo nung tsüinglanglen kü meyonngnem den iba Tribunal indang seal agütsür:  
**Registrar, Debts Recovery Tribunal, Guwahati.**



March 19, 2024 nü New Delhi nung Union Minister aser Rashtriya Lok Janshakti Party tongti, Pashupati Kumar Paras-i osangbenertem den jembidang tangokba noksa nung angur. Taruba Lok Sabha election atema Bihar nung NDA teloktep party tem menden lemsaogo saka RLJP nem menden melemzüktsüba agi Paras-i minister menden nungi anenogo.



## TIR YIMYIM YIMOBILEM (EDITORIAL)

DIMAPUR RASEMNÜ, MARCH (METSÜREMI) 20, 2024

### CAA Ashishir

- Tangsen Lemtur

**T**ang India nung Lok Sabha election, electoral bond scheme aser Citizenship (Amendment) Act (CAA) indang kanga bulua jembidar. CAA ya 2019 kum Parliament nung agizuka liasü, ajisüaka takum Lok Sabha election atongtsü mapang ana nung lia dang Centre sorkari iba ozung mapa kuma benokba sangdongba sülen iba ozung anema asentenshir ola adok tenzükogo. Iba ozung ya talisa Muslim nungertemi ashishir, kechiyong CAA kübok bendanger Muslim nungertem nembo linük senso magütsütsü. CAA ozung kübok Pakistan, Afghanistan aser Bangladesh linüktem nung reshikangshi ajanga 2014 kum December 31 tashi nung India-i arua jenoka alir Hindu nunger, Sikhs, Khristan, Buddhist, Jain mesüra Parsis nunger nem India senso agütsütsü. Iba ozung ajanga Muslim nungertembo sendoker. Indian Union Muslim League-ia CAA anema Supreme Court nung ken o benoka lir. Indian Union Muslim League tenung nung jembitsür senior advocate Kapil Sibal-i Supreme Court dang, kodang bendang linüktem nungi arur Hindu nunger nem senso agütsüdir ibaji joko tanaben magientettsü, anungji temepishiba ken otem ya tangsa rongdak süa angadangtsü nungdak, ta mepishiba sülen court-i item ken o andadangtsü melunga Mongolbar (March 19) nungi item ken o angadang tenzükogo. Tamangba yimsü nung ajemdaker CAA ozung benokba ya linük temzung alema lir, ta shia nija aser lokti aikati iba ozung anema SC nem temepishiba ken o agüja lir. Tamangba yimsü kar amangertem dang shima senso agütsütsü atema CAA ozung latetba agi aikati ashishir. Item linük asem nungi arur tamangba yimsü trok amangertemji reshikangshi ajanga par linük toktsür India nung jenokertem lir ta zungshia India senso agütsütsü. Ano 2014 kum December ita sülen linük asem nungjagi arua India nung jenokertem nembo senso magütsütsü aser parnokbo maneni ozung alema arur bendangertem ama zungshitsü. Ano külen CAA aser National Register of Citizens (NRC) na sendakteptsü ta olulu jembiba ajanga Muslim nungertemi kuli kaketter tejangja melira CAA kübok parnok senso agienadoktsü ta tsübur. Tawa UN Office of High Commissioner for Human Rights-ia CAA ozung ajanga nisung bendangshidangtsü südi ta tebilemstsü katsür aser iba ozung ya ajanga India-i meimchir temeden tsütsü teinyaktsü alema inyaker asütsüa akok, ta aitsüogo. Anogo ishika tejaklen US State Department otongdar Matthew Miller-ia India nung yimsü temeden agütsütsü aser ozung kübok yimsü balala amangertem ajak kasa zungshitsüji tongtibang, ta shiogo. Paisa, US-i iba tensa repranga atadar, ta metedaktsüogo. Amnesty International-ia, CAA 2019 mapa kuma benokba ya India nunger temzung kübok ajak kasa zungshiba aser yimsü nung ajemdaker bendangshidang masüba anema lir, ta aitsüogo. Amnesty International India board chair, Aakar Patel-i, "Citizenship Amendment Act ya bendanga zungshiba ozung lir, koba ajanga yimsü nung ajemdaker nisung bendangshidangba medentsür. Mezung nungi iba ama ozung ya mebenoktsüla," ta metedaktsü. Union Home Minister Amit Shah-i iba ozung ya kodanga magientsü ta shiogo, ajisüaka tatembangbuba obendangjibo Supreme Court-isa agütsüstsü südi ta bilemer. CAA anema benokba ken otem maneni Supreme Court-i angadangtsü aser parnok kechi obendang agütsüdir ta aikati yongyaa atar.

## OLEMSABANG

### Temerenshi aser Timtim

- Imnakala (Chümoukedima)

Aongmetang ola ka angashi, ya kechi ola ta angangdanga ali nung kisa o kera na kipalembu moajang ta puteri sarasademtsür ta paper zulu nung zünger süngmangseta ali nung March 5 nung Tir Tiamongba Aieri LGBTQ ta züluba ngur bilemdanga ali, kü nükla nung item pur dangi arutsü lemantemji yangi sayuba ajak den Tir Yimyim nungi lemsateper.

Putiri sarasademtsüba aser temalenbaji moijing nungi asü? Mulumi nungi ta sümanger. Kechiaser anung ali aser meimchir yangluba Tsüngremi meimchir dang temeim agi sayu o aser ozung agütsüba tetsübuttsü nungi kumzüktsü yamai ashir.

Ibala aibelertem dang ashir nenok jakdang tamasa aliba nisungtem sudadksüba ama nenoka sudadksütsüla, saksüsdoktsü, jendoktsü, merenshitsü, tenük pokdaktsütsü, iba mapang aser tia nung pei adianu aser Tsüngrem bushidangbo kanga aktsü, jashitsü aser tatembang nung tatem maka mulumi.

Asen Tsüngremi Pa temeshiba lai o ozung nung koma shia lir asenoki bushidi, I Sam 12:25 saka nenoki ano mejungi inyakdi süra, nenok aser chuba anaprongla samatsü, Api 11:20 temulong nung mashi koshia alirtem KIBUBA tsüngdang tesempatsü, 21. Ya metetdang temenen nisungji memerenshi malitsü.

*(Maneni asung adok nung...)*

### Tanü arogo inyakyim khen reprangshitsü mapang kati menepogo

- L. Kika Pongener.

*(Yashi adok nungi...)*

Kechiba tanü asen lima nung Para Churches, Prayer Center, Ministry etc. aika tenzuka aor (?) Kechiba arogopur aika pei arogo liaka, lumitsü, tashitak aneptsü, counselling agitsü, kija khuret, kibong khuret, chirnur khuret lemsateptsü...Prayer Center bushia aor...??? Arogotem nungpo arogopurtem Tanela chiyungtsü aser Tanela nungdak peria mangur asü (?) Lai-mashir (Laymen)-tembo arogo sentong nung shilem agitsü maongka mangur asü (?) Arogopurtem Tanela nung tzüra matemer asü (?) Tanü arogotemi kanga junga angatetsübaji...Arogo ya arok tamang tenla, arok tershilem, arok nuboo aser shisatsü agi takum alir ta angatetsüla. Anungji Temeshi mapa (Holy Ordinances) kar...Ordain minister aser Licence akartemi inyaktsüba...Iba dakji alaka, tanga sentong nungpo arogopur ajunga pei dak apet shilem agi ata-a agitsüsa maongka agütsütsüla. Baptist Distinctive nung 'Tamanger shia Putir ka-ka' (Preisthood of all believers)...ta shia aliba ama...Arogopur ajunga pei dak apet shilem agi ata-a agitettsüsa maongka agütsütsüla. Manganutsü mali, tanü arogo aika nung, tongtipang sentong ajak nung tongti-shilem ajak...Toklang tenzükertemi, mesura laishirtemi dang agitsüla...ta angatetba agi...Lai-mashirtem (Laymen) aika pei arogo toktsür...Para Churches aser Prayer Center-i aor asü (?)...ta bilemer. Anungji korabangla, iba tangatetbaji melenshir, arogopur ajunga pei dak apet shilem agitettsüsa sadem-sadema lapoka yutsüra...Arogo nung teronem tanang adoktsü aser arogo-ji tali tashi taitba akümtsü...ta shisadanger.

Aji oda, tang aliba jenjang nung ya-sa ora...Para Churches aika kuma aotsü, Denomination aika akümtsü, Prayer Center & Ministry aika tenung jateta aotsü, mungdang talila razuka aotsü aser arogopur rongnung Tsüngrem dak mamangba 'Atheist' aika kuma aotsü ana nung lir. Aji oda, iba tebilemstsü ya arogotem atema dang masü, mungdang atema-a tebilemstsü tulu ka kumogo. Anungji reverendtem, laishirtem, mungdang aser arogo nung toklang tenzükertem ajaki zübazüba-a magi-i, iba tebilemstsü atema khuret bena lenmang kar bushitsüla. Talisa, tanü arogotem inyakyim ya khen meyipa reprangshitsü mapang kati menepogo...ta bilemer. Anungji tang amaisa ora, lim arogotem nung tekülem sentep ya kanga azung-azunga kuma aotsü aser lim arogotem ya tashi maitba-maitba kuma aotsü aser kopi meli-i 'Mungdang'-a ana-asem kuma lemsa-a aotsü amai bilemer.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## American Bible Society-i Philadelphia nung aliba museum shibangtsü



Faith &amp; Liberty Discovery Center

**March 19, 2024:** American Bible Society (ABS)-i Faith & Liberty Discovery Center shibangadoktsü; küm asem tejaklen ABS-i Philadelphia, Pennsylvania nung iba museum ya dollar sen million 60 indoka yanglua liasü.

March 18, 2024 nü ABS-i sangdong ka ajanga, iba Center ya March 28 tashi dang lapokba sülen April 1, 2024 nü shibangtsü, ta metetdaksü.

March 28 sülen iba Center semdangtsü atema ticket alia alirtem nem sen tanaben meyipa agütsütsü, ta ABS-isa metetdaksü.

COVID-19 lockdown den tanga kuli balala ajanga iba center shibangtsüa aküm.

Iba center lapokba mapang nungi tenzüka timtem aika ajangshia aruogo. July 1, 2021

nungi June 30, 2022 tashi nunga (küm ka piyong) iba Center nung ticket nungi yokzüka senji dollar 54,000 dang liasü.

Tawa ABS nung Tir aser CEO aküm, Jennifer Holloran-i sangdong ka ajanga, "Faith and Liberty Discovery Center lapokba mapang nungi iba Center ya tangazükba aser ajungshiba tesem ka liasü," ta metetdaksü.

Laisa, "ABS mangdang ataloktsü atema yarir Philadelphia partners ajak dang onoki pelar aser iba Centre semdangertem tajungtiba nung tenzüka aruba atema FLDC staff tem danga pelar," ta metetdaksü.

FLDC Executive Director, Rob Wonderling-i sangdong ka ajanga, "Faith and Liberty Discovery Center nung

tenzüksü atema maangka anguba ya akhümket ka liasü," ta metetdaksü.

"Iba center ya Laishiba koda tongtibang, ibaji sayatsü mangdang yur tenzü. Iba mission nung staff temi tongtibang shilem agiba atema ni nüma atanger," ta Wonderling-i metetdaksü.

2021 küm May ita nung lapokba center ya Philadelphia nung aliba Independence Mall nung lir. Iba center ya Khristan yimsü ajanga America nunger putiotsü nung temelenshi adokba sayatsü aser yimsü dak sendakba tangatetbatem sayatsü nükjidong nung lapoka liasü.

Yimti nung küm shia amongba Wawa Welcome America Festival mapang nung iba museum ya semzüka liasü.

## UP nung High Court-i police dang Khristan tetsür 3 maputsü tuyu

**March 19, 2024:** Uttar Pradesh state nung anti-conversion ozüing kübok police-i Khristan tetsür asem aputsü aliba court kati nokdangogo.

Uttar Pradesh nung Allahabad High Court Lucknow bench-i March 18, 2024 nü college azünger Khristan tetsür asem nem anticipatory bail agütsü aser police dang parnok maputsü tuyuogo.

High Court nung Khristan tetsür asem atema ken o jembitsür lawyer, Munish Kumar Chandra-i, "Onok kanga pelar, kechiyong joko tetsürtem jagi tetsübu kecha makai sademsadema senzütetsü," ta metetdaksü.

March 19 nü osangbener den jembidang Kumar-i, "Lower court kati onoki mepishiba bail magizükba sülen onoki maneni temaba court nung temepishiba ken o benoka liasü," ta ashi.

March 12 nü kasa ken o nung Lucknow diocese nung putir, Dominic Pinto densema

Khristan 13 nembo bail agüja liasü.

Arogo indang social work center nung Director, Dominic Pinto den Protestant Khristan 10 taküm February 5 nü pua liasü. Iba center nung sarasadem sentong ka agiba mapang nung Khristantemji apu. Iba sentong nungji tangartem Khristan yimsü dangi meyipdaksü, ta tai tonglokja parnok anema Uttar Pradesh Prohibition of Unlawful Religious Conversion Act, 2021 ozüing kübok ken o benoka liasü.

Lucknow diocese nung chancellor, Donald D'Souza-i, tai tonglokja aliba nungji ochi tila kata mali, ta metetdaksü.

"Iba sentong nungji Pinto bo maden saka pastoral center nung sarasadem sentong agitsü atema pai temelaba agüja liasü," ta D'Souza-i metetdaksü.

D'Souza-i, nisung kari parnok "Khrist Bhakts" (Khrista sülen anidakertem) ta peisasa ajar; parnokji Khristan

yimsü dangibo memeyip saka parnoki Khrista tesayubatem benshir aser sarasadem sentong ayongzüka agir, ta metetdaksü.

"Iba sentong nungji shingiaia Khristan yimsü magizük mesüra Khristan yimsü agizükang, ta majungshi, ajisüaka police-i ozü nisungtem apu," ta D'Souza tamalen metetdakja liasü.

Kasa ken o nungji college azünger Khristan tetsür asem nemjia tai tonglokja liasü.

Hindu yimsü alia amangertem jagi, February 5 nü Navintha nung lokti tulu adenshia sentong agidang nisung aika Khristan yimsü dangi meyipdaksüogo, ta putir Pinto den pastor tem nem tai tonglokja liasü.

Yaküm January nungi November ita tashi nung India nung Khristantem anema inyakba tatalokba 687 liasü aser iba nungjagi tatalokba 287 bo Uttar Pradesh state kija nung liasü (United Christian Forum report).

## ANOGO ABEN TSÜNGREM DEN

## Tuluba akümstsü taremsük

"Anungji Tsüngremi mapang tetemsü nung nenok uludaktsütsü asoshi nenoki nenok sasa Pa tashi taitba kübok ajemalua kümang." I Peter 5:6.

"Adianutemi Yisu dang semtu benjung nung yimjak nung sayatenya mapa inyaksü ajungshi (Yn 7:4). Yisui parnok dang langzüa ashi; "Kü mapang ano matong, saka nenok mapang teti renema lir" (Yn 7:6).

Pa adianui ajungshiaka Pai yimya tajung agi parnoki ajungshiba magizük. Yimya nisungi Tsüngrem mapa mangateter, aser shi-i bilembaji Tsüngrem anema tsükchir ta Pai meteta liasü (I Kor 2: 14). Sayutsünger aikati shi nisungi ajungshiba den medemdanga Tsüngrem mapa inyakdang, Pai mulungba memeteti akümer. Shi jangraba nung tenzükdang tenzükbaba mapa aika teraksa kümdaktsür; Seraphimi pa tashikang agi tejak nembanger külemba jagi ajemalua Tsüngrem tenzüksü lesson agütsür (Isa 6:2-3).

Takokji temalen nungi alutsü ta Yisui meteta liasü (T.Ken 75:6,7). Iba tangatetba nung tenem nung Pa atidandang masü ta langzü (Mt.4:8-10). Tebui mulungba ama, Pa kibur ta angateta, Pa dang temekok ajak agi apudaktsü Tebu mapa mapang matong tashi aremzüka ata (Fil. 2:9-11). KodangYisui am pungo aser ango ana agi nisung meyi pungo dak tali mesüba angu, nüburi Pa chuba kümdaktsünü. Saka Pai Tebu mapang ataa aji magizük (Yn.6:15).

Tsüngremi renema makaba nung nisungi temaba menden nung mendaktsütsü makok, mesüra nisungi Tsüngremi mulungba menden nungi anizüktsü makok. Pei sasa ulubaji tejashitsü.

Oba, Nai mulungba aremzüka atatsü kü dang yariang.

## S Korea nunger missionary ka chioktsü atema UN dang mepishi

**March 19, 2024:** Tang North Korea nung pua aliba South Korea nunger missionary, Choe Chun-gil'er jabasoi tebu chioktsü atema inyaksü UN dang mepishiogo.

2014 küm North Korea nung South Korea nunger arrshi küm 65 missionary, Choe Chun-gil pua liasü; pa den South Korea nunger trok North Korea nung küm aika pua lir.

"Choe'er jabaso, Jin Young-i tan hopta Geneva semdangtsü aser UN dang North Korea nung pua alirtem chioktsü atema mepishitsü," ta South Korea unification ministry-i metetdaksü.

"Geneva nung Young-i alima linüktem dang tebu den tangar South Korea nungertemji kechi jenjang nung aliar metettsü atema yariang ta mepishitsü aser North Korea dang parnok ajak chiokang ta mepishitsü," ta unification ministry-isa metetdaksü.

Presbyterian pastor aser taoba mapang missionary, Kim Kuk-gi-a North Korea nung pua lir.

2015 küm May ita nung North Korea nung ketdangsertemi linük yimtiba, Pyongyang nung missionary Choe aser Kim na nem

osangbenertem den jembidakja liasü.

Iba senden nungji missionary ana jagi, South Korea atema North Korea nunger miim osang lazüktsü atema tena nem sen aika agüja liasü ta tena nem nangzükdakja liasü.

February 26 nungi April 5 tashi 55buba UN Human Rights Council senden tagidak lir, aser iba mapang nungji Jin Young-i alima linüktem dang teyari meshitsü.

Young-isa North Korean human rights atema UN special rapporteur, Elizabeth Salmon aser North Korean human rights atema US special representative, Julie nata ajurutsü.

Paisa South Korea ambassador for international cooperation on North Korean human rights, Lee Shin-hwa-a ajurutsü tebilemba lir.

Tamalen South Korean unification ministry-i, North Korea nung pua aliba South Korea nungertem chioktsü atema UN dang teyari meshitsü asoshi parnoki United States, Japan aser Canada linüktem den jembitsü, kechiyong North Korea nung item linüktem nungi sensotema pua lir, ta metetdakja liasü.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Sozü**

(v) azüklen teka aser tetsüng agi senzüba (clamber)

\* Shitsü aser shingotemi süngdong azük nung sozür.

**Sü**

(n) ang agi atakba tabentsü süoshi (shawl)

\* Asangbai kü nem sü tajung ka agütsü.

**OLONG PAITEP # 6732**

|    |  |    |   |    |   |    |  |    |
|----|--|----|---|----|---|----|--|----|
| 1  |  | 2  |   | 3  |   | 4  |  | 5  |
|    |  |    |   |    |   |    |  |    |
|    |  |    | 6 |    | 7 |    |  |    |
| 8  |  |    |   |    |   |    |  |    |
|    |  |    |   |    | 9 |    |  |    |
|    |  | 10 |   |    |   |    |  |    |
| 11 |  |    |   |    |   |    |  | 12 |
|    |  |    |   | 13 |   | 14 |  |    |
| 15 |  |    |   |    |   |    |  |    |
|    |  |    |   |    |   |    |  |    |
| 16 |  |    |   |    |   | 17 |  |    |

**TIPIEN**

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

**LANGTSÜNGLEN**

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

**OLONG PAITEP # 6731 TELANGZÜBA**

**TIPIEN :**

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

**LANGTSÜNGLEN :**

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

**NAI-A YA METETTER MA**

**Most Contributions to Handprint Painting**



Shiv Nadar School Faridabad ajanga alima otsü tassen ka yangluogo aser ibaji ghonda ka nung nisung teimtibai handprint painting nung shilem agiba atema lir. March 14, 2024 nü kaketshir aser tesayur 2232-i #EveryDropCounts pledge noksa ka yangluba atema Guinness World Record title nguogo. Iba sentong ya actress, model, activist aser entrepreneur Gul Panag-i tenzüksü aser Official Adjudicator, Guinness World Records Rishi Nath aden.

**Manipur nung IDPs atema special polling stations lapoktsü**



**Imphal, March 19, 2024 (Agencies):**

Election Commission of India (ECI)-i Manipur nung Lok Sabha elections atema Special Polling Stations (SPSS) lapoktsü sentong renemogo.

Iba ya Internally Displaced Persons (IDPs) atema lir. Manipur nung April 19 aser April 26 shilem ana lemsar polling asütsü.

Manipur chief electoral officer (CEO) Pradeep Kumar

Jha menden ser senden ka amendang IDPs atema sentong renem.

Iba senden nung District Election Officers (DEOs) aser Superintendents of Police (SPs) ajak aden.

Manipur nung Meitie aser Kuki nunger tsüngda mepetmesü adokba ajanga nisung 61,000 tema pei talidak toktsür relief camps nung jenoka lir.

Senden nung Manipur CEO-

i DEOs o SPs dang election personnel training agütsü, mapa lezmüksütsü aser security maparen indang lemsatap.

Manipur CEO Pradeep-isa national aser state political parties nungi teshimtet nübotem den senden ka amendang Lok elections dak sendakba osangtem lemsatap.

Iba senden nung CEO N Praveen Singh, state police nodal officer, joint CEOs aser state nodal officers aden.

**Tripura nung Bru nunger 17000-i votes enoktsütsü**

**Agartala, March 19, 2024 (Agencies):**

Tripura nung Bru nunger 17,000 shi kati Lok Sabha election nung votes enoktsü.

October 1997 nung Mizoram nung mepetmesü adokba ajanga Bru (Reang) nunger kibong aika North Tripura district nung oa jenok.

North Tripura kübok Kanchanpur district Bru migrants (5,000 families) 30,000 shi relief camps 6 nung jenokdaksü.

July 3, 2018 nü Centre,

Mizoram sorkar, Tripura sorkar aser Mizoram Bru Displaced People's Forum (MBDPF) tsüngda tenangzüktep ka agia liasü.

Iba sülen Bru nunger Tripura kübok tesem 12 nung lidaktsü.

"2023 Assembly election nung state election kettangsurtemi auxiliary polling stations kar lapok aser itemji permanent polling stations kümogogo" ta Tripura Chief Electoral Officer (CEO) Puneet Agarwal-i ashi.

"2023 Assembly election nung Bru tebilemstü ya tongtipang liasü kechiyong parnok district balala nung lemsa. State kübok tesem 12 nung Bru nunger teti atema lidaktsü. Taoba assembly election nung onoki auxiliary polling stations lapok aser itemji tesülen permanent polling stations kümduksüogogo. Bru nunger teimba ka voter list nung lir aser parnok 17,000 shi kati Tripura nug votes enoktsütsü" ta pai ashi.

**Congress-i aibelena takok angu nunga BJP nung adentsü: Sarma**

**Guwahati, March 19, 2024 (Agencies):**

Congress nem vote enoktsü nunga tajangzük kecha mali kechiyong takok angurtemi BJP nung adentsü ta Assam chief minister Himanta Biswa Sarma-i ashi.

Karimganj district BJP office nung CM Sarma-i election campaign

tenzükdang "candidate shingaija Congress nung medennür aser BJP nung dennür" ta ashi.

"Congress candidate ka maneni Congress nung adentsü asü masü iba tasüngdangbaji tuluba lir. Tang shingaija Congress nung medennür, nisung ajaki BJP nung dennür. Ni nisung ka dak alaka

tanüngba Congress candidate ajak BJP dangi anir arutetra Congress nem vote agütsüba nung kechi tajangzük ali. Prime Minister Narendra Modi ya anü aser asenok ita lir" ta CM Sarma-i ashi.

Congress candidate temi takok angu nunga parnok Bharatiya Janata Party (BJP) nung adentsü ta paisa ashi.

**Ex-IAS officer Lalmalsawma-i Mizoram Lokayukta chairperson inyaker**

**Aizawl, March 19, 2024 (Agencies):**

Mizoram Lokayukta nung chairperson inyaksü atema retired Indian Administrative Service (IAS) officer Lalmalsawma shimogo.

Mizoram governor Dr Hari Babu Kambhampati-i retired IAS officer Lalmalsawma nem tezüngzüktep agidaktsüogogo.

Lalmalsawma ya Arunachal Goa Mizoram and Union Territory (AGMUT) cadre nung 1983-batch kettangsur ka liasü.

Lalmalsawma-i küm 35 tashi Delhi, Goa, Mizoram aser central government nung mapa



balala inyaka aruogo. Pai finance, education, health, SC/ST/OBC welfare aser general administration wadang nung inyaka liasü.

1996 nung 2000 tashi pai Ministry of Human Resource Development nung director inyaker.

Lalmalsawma-isa Mizoram nung chief electoral officer (CEO) ka ama küm 8 tema inyaka aruogo aser idangji 2005 küm Mizoram assembly constituencies delimitation mapa inyaker.

January 2015 nung Palestine elections atema international observers 4 shimba nung pa India nungi tenüng jateta shim aser idangji pa alimai meteta aküm.

### Myanmar nung nüburtem tepsetba osang angazüka UN shisabulur

**Yangon, Metsüremi/March 19 (Agencies):** Myanmar nung military-i nüburtem aliba tesem nung bomb poklokja amakba osang angazüka United Nations tekolakbai kanga süoki ia bilemba lemsatepogo.

Myanmar kübok Rakhine state nung yimtsüngtem anüing nung maka nisung ter dak tema tepsetba osang angazükba sülen Antonio Guterres-i Hombar aonung menor süngjemshitsü ayongzükogo.

Arakan Army (AA)-i November ita security force tem amak tenzükba sülen iba state mepetmesü tulu nung arudar. AA-i iba jenjang agiba ajanga 2021 küm military-i sorkar atsüngba mapang ceasefire benoka aliba tembangdakja liasü.

Yimtsüng nung alirtemi AFP dang nisung 20 dak tema asüba osang metetdaksüogo.

"Tanü Minbya jila nung nüburtem tepsetba aser yirutsüba den military-i tang anüing ajanga yimtsüng balala amakba osang angazüka Guterres shisabulur," ta UN tekolakba deputy spokesperson Farhan Haq-i ashi.

"Rakhine State nung mangatetep tuluba kümyonga aoba ajanga nüburtem tali prokshidaktsür aser tang nüburtem jenjang mejungi aliba aser mesenmetui amshia aliba tali tamajungba kümdaktsür.

Secretary general-i kin o kin tsüngda mangatetep tamajungba küma meyoktsü atema süngjemshitsü ayongzükogo," ta pai ashi.

Minbya jila ya state yimtiba Sittwe anütoklen lir, koba hopta ishika tsüngda AA sepaitemi meketbanga arudar.

Hombarnü Tayimtsü, drone aser artillery amala amshia anüing ajanga amakba mapang Thar Dar yimtsüng dak kongshio go aser iba lendong nung tanur 10, tetsür pezü aser tebur 10 tepsetogo, ta yimtsüng nung alir kati ashi. Iba yimtsüng ya Rohingya nung yimtsüng ka lir, koba Minbya nungi anütoktiplen km 5 shi pilar lir.

"Ozü yimtsüng nung raratepba kecha maliasü, saka parnoki bomb pokloktsü," ta iba nisungba yagi shia liasü.

Yimdaklirsa ano kati ashiba agi, bomb pokloktsüba sülen nisung 23 süogo aser nisung 18 yiruogo.

Mobile networks timba mejungi akümba sülen iba tesem nung alirtem den tongteprateptsü asoshi kanga tasak kümogo.

Buddhist nuner timba aliba Myanmar nung küm aika Muslim Rohingya nungertem rishikangshia arudar aser parnok million ka shi kidanger Bangladesh kübok Cox's Bazar nung camp balala nung jenoker lir. Parnok ya timba 2017 küm

military-i jenjang tesashia agiba sülen jena aoba lir.

Myanmar nung military yimsüsürtemi Rohingya nung ya bendanger ama züingshir aser parnok nem lisopur jenjang magütsür.

Linük sepaitemi Sittwe bo tang tashi matsüingdaksüi lir, ajüsüaka hopta ishika tsüngda AA sepaitemi iba tesem temeket nung aliba tesemtem atsünga arudar.

Myanmar nung rara ajanga kidanger India aser Bangladesh daka kongshio go.

Taoba ita Myanmar nung khatapba mapang arrtsü adena mortar shell tem khaloktsüba sülen Bangladesh nung nisung ana tepseta liasü.

AA ya Myanmar kübok arrtsü nung aliba kin balala telungpur telok rongnung ka lir. Item telungpurtem yagi nüjiso meshia arudar.

Myanmar nung 2021 küm military-i nüburtemi shimba sorkar atsüingtokba sülen mepetmesü tulu adoka arudar. Sorkar atsüngba sülen linük ajunga nung nüburtemi longkak ait tenzük koba military-i tashiyim amshia azüoka arudar. Iba lendong nung nüburtem aika tepsetogo aser yiruogo.

Kasa mapang nung military sorkar anema nokdakertem aika junta-i tepuokdaki yokogo, kong civilian lenir Su ki den tongtibang lenir aser activist tem densema lir.

### Hamas lenir tejen ka tepsetogo: White House

**Washington, Metsüremi/March 19 (Agencies):** Israel-i Hamas militant telok third-in-command Marwan Issa taoba hopta tepsetogo, ta White House-i Hombarnü metetdaksü. Anogo ishika tejakdang Gaza nung tesem ka pa dak rangloker amak saka pa asü masü mejangja ta Israel-i metetdaksür liasü.

Deputy military commander ka ama Issa ya October 7 nü rara tenzükba sülen Hamas telok nungi asür rongnung lenirtem rongnung tejentiba asütsü.

Israeli media sangdong balala ajanga ashiba agi, Issa ya taoba hopta central Gaza nung Nuseirat refugee camp kübok tunnel complex ka amakba mapang tepseta liasü.

Hamas indang military wing - Izzedine al-Qassam Brigades indang deputy commander ya Israel-i bushia aliba lenirtem rongnung ajak dang tongtibangba liasü. European Union-ia Hamas lenir ya parnok indang terrorist blacklist nung züingoksemer liasü.

"Hamas telok nungi lenirtem rongnung tasembuba Israel-i taoba hopta

tepssetogo," ta National Security Advisor Jake Sullivan-i, Tir Biden aser PM Benjamin Netanyahu na sensaksem indang metetdaksüba mapang ashi.

Sullivan-i ashiba agi, Israel-i Hamas indang battalion aika raksatsüogo aser lenir tejentem densema Hamas telok nungi sepaitem meyrejang aika tepsetogo.

"Tanungba lenirtem Hamas tunnel network nung atsüka alitsü ta bilemer aser parnoka obendangtsü," ta pai shisem.

Israel military-i March 11 nü ashiba agi, parnoki Issa dak rangloker March 9 aser 10 nü anüing ajanga central Gaza nung ali telung nung aliba tunnel ka makogo. Military-isa October 7 nü Israel amaktsü atema tasa asartem rongnung Issa-a densema liasü, ta ashi.

Issa ya Hamas armed wing Ezzedine al-Qassam Brigades tekolakba Mohammed Deif indang deputy liasü, ta Israel otongdar Rear Admiral Daniel Hagari-i ashi.

### North Korea nung rocket launcher drills ayongzükba agiogo

**Pyongyang, Metsüremi/March 19 (Agencies):** North Korea lenir Kim Jong Un-i repranga lia tawa yangluba "super-large" multiple rocket launcher tendangogo.

North-i short-range ballistic missiles ishika tendangba indang South Korea aser Japan nati metetdaksüba sülen anogo ka lir iba drill ya ayongzükba agiogo, koba ita anashi nung mezüingbuba tetendangba liasü.

Official Korean Central News Agency (KCNA)-i ashiba agi, iba drill ya rara

mapang iba 600-millimetre (23 inches) multiple rocket launchers ya koda takok ngua amshitetsü aji tendangtsü nükjidong nung ayongzükba agiogo.

Kim shibai North Korea indang military modernize asütsü atema nükjidong yur kümtem tsüngda prangbong injang aser hadir balala tendangba asadanga arudar, pai ashiba agi, rara atema renemshiba mapang iba rocket launchers ya kanga tongtibang asütsü.

Seoul military-i Hombarnü sangdong ka ajanga parnoki,

Office of the  
**Dimapur Merangkongtsür Telongjem**  
Chümoukedima Sub-Unit  
**Tenüngsang aser tetushi agütsür**

Wb. Suponglepden Imsong aser Wt. Temjennaro tena jala **Kongru Sentinenla Imsong** NSSB Exam 2023 nung L.D.A cum Computer Assistant (District) NST. Department nung jenjang tajung ngutetba asoshi tenüngsang aser tetushi agütsür aser pelaba lemsateper.

Maneni nü taküm aser wadang ajak nung Tsüngrem lenisüba denang ta sarasademtsür.



Sd/-  
**Wt. Temjennaro Tongti Zülur**

Sd/-  
**Wt. Yashilila Mendenbula**

Office of the  
**DIMAPUR YIMJENKIMONGTSÜR TELONGJEM**  
Dimapur : Nagaland - 797112  
**Tenüngsang Agütsür**



Wb. Ponawati Tzudir aser Wt. Nukshimongla Imsong na jala **Kongro Tajenyula Tzudi** NPSC CTSE (Agri, Allied and others) tatidang nung Evaluation Inspector (Gazetted Junior Grade B) under Planning & Transformation Department nung takok tulu ngutetba asoshi Dimapur Yimjenkimongtsür Telongjemi pelaba aser tenüngsang lemsateper.

Tsüngremi ano tarutsü anogotem aser tenzükba wadang maneni azükaru lidakjang ta sarasademtsür.



Sd/-  
**Wt. Bendangienla General Secretary DYT**

Sd/-  
**Wt. T. Atsungla Lemtur President DYT**

**KIBONG KÜMER KÜM 50 AJUNGBA TEPELA ANOGOMUNG**



**MR. B. WATI KICHU ASER MRS. NAROLA WALLING**  
MARCH 20, 2024

**"Kechiaser Kibuba tajung lir, pa temeim taochi aser putu ajak dang Pa temulung lemtetba tatem maka" T. Ken 100:5**

Tsüngrem taochi aser temeim agi ozü tsürabur kibong kümer küm tenem ajungba anogo tajung tongtetsüsa taküm arishi moatsü nung Tsüngrem tenüing asanger aser tena nem tenüngsang tulu agütsür. Tsüngremi ano maneni tsürabur arishi talang moajang ta Jala, Jabaso aser Semchir temi sarasademtsür.

North Korea nung short-range ballistic missiles ishika tendangba lazükogo, ta metetdaksü. Iba super-large multiple rocket launcher dang ya Seoul aser Washington nati KN-25 ta ajar aser iba ya short-range ballistic missile ka lir, ta South Korea indang Yonhap news agency sangdong ka ajanga metetdaksü.

North Korea nuclear weapons programme dak sendakba nung ballistic missiles metendangtsü atema tenokdangba agütsür lir.

State media nung sayuba noksa balala nung Kim ya leather jacket tanak ka semer general tem den rocket launcher drills repranga ataba nguogo.

Pyongyang-i kümtem tsüngda inter-Korean policy timba ka nungi atsüingnogo, kong kidanger den military pact ka yanglur aliba magi kümdukja South Korea ya tsükchirtem rongnung tongtiba ta sangdongba densema lir. Parnokisa prangbong injang aser hadir balala tali tendanga tenzükogo, submarine ka yanglua amshi tenzükogo aser parnok indang mezüingbuba spy satellite anüing yokogo.

### 5th Mokokchung inter-ward football tournament osang (Artang o Mongsenbai aser Arkong o Sungkomen na semifinal asayatsü)

**Mokokchung, Metsüremi/ March 19 (TYO):** 5buba Mokokchung inter-ward football tournament 2024 tanü 19th March nü tasembuba quarterfinal Arkong Ward o Alempang Ward na tsüngda yangi Imkongmeren Sports Complex, Mokokchung nung asayaba Arkong-i goal 5-0 agi Alempang madak takok tulu nguteta liasü.

Iba asaya nung mezüing goal ji Arkong nungi jersey No. 8, Aripong-i minute 11 nung idaktsü. Tanabuba goal ji minute 28 nung jersey No. 10, Tajungsang-i yok aser tasembuba goal ji jersey No. 9, Bendangtoshi-i mezüing asaya tesadang atemtsü lia 35+2

minute nung agütsü. Pezübuba aser pungbuba goal anaji jersey No. 11, Noklensunep-i minute 65 & 70+1 nung idaktsü. League match asayadang Arkong ya Pool 'B' winner aser Alempang ya Pool 'A' runner liasü.

Pezübuba quarterfinal match Pool 'D' winner Sungkomen o Pool 'C' runner Tongdentsuyong na asayaba, Sungkomen-i goal 2-1 agi Tongdentsuyong pur tsükdaktsü. Iba asaya nung Sungkomen-i mezüing asaya tesadang nung goal ka aser tanabuba asaya tesadang nung goal ka ta agütsü. Mezüing goal ji jersey No. 8, Tangmong-i minute 31 nung, aser tanabuba goal ji jersey No. 7,

Tarepnungsangi minute 51 nung agütsü. Tongdentsuyong-ia kanga meranga asaya-a aru aser parnoki asaya atemtsü minute ishika dang anünga lia jersey No. 10, Opanglemzung-i minute 70 nung goal ka küptokteta liasü.

Mezüing semifinal asayaji March 20 nü (Bodbarnü) nikong 2:00 ako nungi tenzüka Artang Ward o Mongsenbai Ward na asayatsü aser tanabuba semifinal ji March 21 nü (Brihostibarnü) nikong 2:00 ako nungisa Arkong Ward o Sungkomen Ward na tsüngda asayatsü. March 22 nü anisüngzüik agir külen March 23 nü final match asayatsü sentong renema lir.

### KL Rahul IPL asayatsü temsüa akümba sangdongogo



**Metsüremi/March 19, 2024 (Agencies):** KL Rahul Indian Premier League 2024 season asayatsü atema temsü akümba sangdongogo. Iba asayamung ya Hokolbarnü nungi tenzüksü. Lucknow Super Giants (LSG) captain nem Bengaluru nung National Cricket Academy (NCA)-i fitness certificate agütsüogogo aser pa anogo ana tsüngda team nung adentsü. LSG pur iba asayamung nung mezüingbuba asaya Deobarnü Jaipur nung Rajasthan Royals den asayatsü.

Osang ajanga ashiba agi, BCCI medical team-i Rahul dang asayamung tetenzüklenbo wicket keeper mamentsü aser batsman ama dang asayatsü tetuyuba agütsüogogo.

"Pa anema kümogo aser anogo ka ana tsüngda club nung dentettsü. Pa quadiceps nung tashiba ka liasü aser iba atema injection dena agiogo. Pa NCA nung temang tendanga liogo aser pa asayatsü temsü kümogo. Ajisüaka pa tang tangsa tangbo wicket-keeping shilem magitsü shiogo," ta source kati ashi.

Hyderabad nung England den Test asayaba mapang Rahul-i quadiceps tachichilen

tashiba ka aliba ashishia liasü. Iba sülen pa tanungba Test tem nung shilem magitet.

BCCI-i mezüingbo Rahul shilem 90 bo tajungba kümogo aser BCCI Medical Team tawabangba kübok renloka odar ta ashi. Ajisüaka parnoki England nung specialist ka dang

ken o ashishitsü telemteba agi aser ibayongji Rahul England-i oa liasü.

Kasa mapang nung Shreyas Iyer, shiba teberem nung timtem aliba ajanga Mumbai team Ranji Trophy final asaya tatembangbuba anogo ana nung masayai liasü pa-a IPL asayatsü asoshi temsüa kümogo ta Deobarnü sangdongogo.

Kolkata Knight Riders (KKR) captain shiba team den longjemogo, pa dang kümdanga asayatsü atema tetuyuba agütsüogogo.

National Cricket Academy (NCA) Bangalore den angatettepba sülen Iyer-i Mumbai nung spine specialist ka den ajuruteper aser doctor-i pa asayatsü atema temsüa lir ta sangdongogo, ajisüaka pa tetsüing songtoka inyaksangshiba mapang kümdaktsü shiogo.

### Hasaranga IPL mezüingbuba asaya asem nung masayatettsü



**Metsüremi/March 19, 2024 (Agencies):** All-rounder Wanindu Hasaranga, IPL nung Sunrisers Hyderabad nungi mezüingbuba asaya asem nung shilem magitettsü,

kechiyong pa March 22 nü nungi tenzüka Bangladesh den Test ana asayatsü aliba Sri Lanka squad nung züngoksemogo. Hasaranga, shiba Sri

### 3rd North East Games 2024: Nagaland temaba jenjang nung lir



**Dimapur, Metsüremi/ March 19 (TYO):** 3buba North East Games 2024 nung asayatem March 19 nungi asaya tenzükogogo. Mezüingbuba anogo NE kübok state balala nungi asayatem football, volleyball, archery, athletics, badminton,

basketball, boxing, pencak silat, sepak takraw, table tennis, wushu, aser lawn tennis nung shilem agiogo.

Mezüingbuba anogo Nagaland team-i medal 17 (gold 8, silver 5 aser bronze 4) ngua parnok tema jenjang nung lir.

#### Mezüingbuba anogo medal tally:

| 3rd NORTH EAST Games 2024 Medal Tally |      |        |        |       |
|---------------------------------------|------|--------|--------|-------|
| DATE : 19/03/24 4:30 PM               |      |        |        |       |
|                                       | GOLD | SILVER | BRONZE | TOTAL |
| NAGALAND                              | 08   | 05     | 04     | 17    |
| MANIPUR                               | 06   | 04     | 06     | 16    |
| ASSAM                                 | 04   | 09     | 05     | 18    |
| MEGHALAYA                             | 02   | 00     | 03     | 05    |
| ARUNACHAL PRADESH                     | 00   | 01     | 01     | 02    |
| TRIPURA                               | 00   | 01     | 01     | 02    |
| MIZORAM                               | 00   | 00     | 00     | 00    |
| SIKKIM                                | 00   | 00     | 00     | 00    |

Lanka team nungi Test pezü nung asaya liasü pa white-ball cricket nung ranloker asayatsü atema taoba küm August ita Test asaya nungi anena liasü.

Ajisüaka arishi küm 26 tain asayar ya tawa shimba Sri Lanka team nung züngoksema lir, kong spinner Nishan Peiris-a densema lir, shiba tang mezüingbuba Test nung asayatsü lir.

Mezüingbuba Test asaya ya Sylhet nung March 22 nungi 26 tashi asayatsü aser tanabuba Test March 30 nungi April 3 tashi Chattogram nung

asayatsü. Hasaranga ya SRH puri base price sen crore 1.5 agi alizüka liasü.

SRH pur taküm IPL nung mezüingbuba Kolkata Knight Riders den March 23 nü Kolkata nung asayatsü. Iba sülen parnok Hyderabad nung March 27 nü Mumbai Indians den asayatsü aser March 31 nü Ahmedabad nung Gujarat Titans den asayatsü.

Hasaranga ya SRH pur April 5 nü Chennai Super Kings den kidang asayatsü aliba asaya nungi asaya tenzüksü.

**BILEMDANGANG**  
 "Temulungsentsü merek mereka alitemi tia tensa ajak nung tajung dang reprangteter."